

四庫全書

集部

欽定四庫全書

東里續集卷十六

明 楊士奇 撰

跋

恭題三朝賜誥命刻石後

太宗文皇帝御天下二十有三年文臣皆未有得賜誥
勅者惟永樂十年文臣得賜誥及封贈祖父母妻者尚
書八人太子少師一人翰林則內閣之臣五人臣士奇
亦與數焉蓋時甚重之也仁宗昭皇帝初臨御循洪武

之制文臣考最者悉賜誥勅封贈而首及輔臣時制草已定上親御宸翰於輔臣誥內增二語勿慮崇高而難入勿以有所從違而或怠嗚呼明聖之心二帝三王之心也臣祇事三聖賜誥凡十有五通永樂四通洪熙十通宣德一通臣士奇心恒愧悚驚鈍無庸不能效報萬分之一上有忝於榮命然不敢忽也謹繕寫刻石以永示子孫

恭題仁廟賜勅及詩刻石後

臣士奇始以翰林春坊兼職恭事仁宗皇帝於東宮至嗣寶位凡二十有二年以愚直特承恩遇愈久而愈加始終無間也嗚呼宮車遠矣每捧誦向所賜勅及詩感慟不已謹錄侍從來北京後所被賜者刻石以傳前被賜者尚多先悉歸泰和寶藏當別刻之

恭題宣廟賜勅刻石後

宣宗皇帝在位十年以臣士奇先朝舊人而燭其愚誠信任禮遇不衰益盛所被宸翰之賜多矣悉識玉璽石

二勅寵恩尤重嗚呼今鼎湖之駕不復時一啟玩無任
追惟感慟之至謹繕寫先刻貞石遂恭識于下方

恭題天恩卷後

右臣士奇永樂八年五月十八日於文華殿陳情題本
錄副時太宗皇帝親征北邊仁宗皇帝監國南京中外
政務悉聽令旨裁處臣士奇以左春坊左諭德兼翰林
院侍講留輔導同母之弟羅京聞北京種田之令寓書
告別士奇將行蓋不得已具此啟陳情仁廟一再覽之

以示吏部尚書兼詹事府詹事蹇義兵部尚書兼詹事
府詹事金忠右春坊大學士兼翰林院侍讀黃淮曰士
奇素無片語及私此當從之顧忠曰併永昌軍役亦免
之即親灑寶翰題十九字於題本之後付給事中施行
十九字即所得令旨也又命忠速行永昌衛且令官給
憲口糧脚力歸天地大德士奇之不肖何以能報也既
拜恩命遂辭口糧脚力之賜及部牒至永昌憲先數月
卒衛即日發遣憲妻子男女五口歸泰和從京同居依

先人之墳墓聚親戚于里閭優游恬嬉於無事之域蓋未嘗一日忘朝廷保全之恩也京今歲來省士奇於北京兄弟相對皆蒼顏白顛每論往事感激之至零涕無已京請錄當時陳情題本以垂示羅氏子孫遂併志其槩嗚呼羅氏後世尚勉思力學務善持身保家以不忝朝廷之大德於永遠哉

恭題朱孔易所受勅命後

右宣德二年翰林院編修臣朱孔易所受勅命四道孔

易一道其父母妻各一道孔易謹通錄副以藏間屬臣
士奇識於後臣記憶永樂初詔求四方善書士寫外制
又詔簡其尤善者於翰林寫內制且出秘府古名人法
書俾有暇益進所能於時孔易無工署書駸駸希元
矩度風韻偉然傑出也一日上御右順門召孔易書大
善殿扁舉筆立就深荷嘉獎即日授中書舍人明日有
旨凡寫內制者皆授中書舍人蓋善書授官自孔易始
後北京宮殿成禁扁皆孔易書遂陞編修又五年始授

此勅編修史官也勅文首末則當時通命史官之詞孔
易歷事四朝皆以法書被知遇受勅後無幾陞春坊中
允今雖老筆力愈勁蒼然歲寒松柏也位之所進殆未
可量綸章之褒亦殆未止於此乎謹拜手識于後云

恭題謝庭循所授御製詩卷後

昔我宣宗皇帝萬幾之暇講論道德之餘閒游藝書畫
時非厚重端雅之士不得給事左右永嘉謝庭循獨見
愛重恒侍燕閒蓋庭循清謹有文每承顧問必以正對

尤精繪事每有所進必荷褒錫此卷其一也上素重官
職不輕授未幾進庭循五品為錦衣衛千戶蓋亦無重
其為人也今宮車遠矣庭循珍襲此卷甚謹以臣士奇
宣德舊臣間出示之臣拜稽瞻誦感慟歆艷并發於中
有不能已焉嗟夫是賜也非庭循不能得亦非庭循不
足以當猗歟盛矣若龍光寶氣上燭雲漢必有神物護
持於永遠謝氏之榮豈有窮乎

恭書御試策題後

永樂十年三月上親策禮部會試所選士第其高下而臣劉咸中第二甲四名賜進士出身臣咸欽拜恩榮欣艷遭遇既以所被賜策題裝潢為卷并附錄所對文于後而屬臣士奇識之是歲二月臣士奇等奉詔考會試既鎖院五日特命禮部尚書臣呂震諭之曰其務精擇必取實學庶幾將來所用得人臣士奇欽承惟謹時天下士聚試者三千人得百人以進蓋擇之精者也士獲預茲選固難矣至奉大對娓娓三千言皆中理道而預

十人之選蓋又難也咸可謂能言其所學矣然聞之非
言之難行之惟難咸今有祿位為國家贊憲綱外藩必
善推所學以事上莅下而仰副所用得人之盛意庶幾
上無負恩命下無忝科目臣士竒與聞聖諭謹拜手錄
載如前咸其顧念而懋敬之哉

恭題蹇尚書所藏高廟御書後

右吏部尚書兼詹事府詹事臣蹇義為中書舍人時太
祖高皇帝為更今名親灑宸翰賜之者也又三十有二

年臣士奇得拜觀焉天章昭回日華煥發散為慶雲龍
騰鳳翥臣士奇忘其僭踰敢竊紬繹其說先儒朱熹釋
義之言曰心之制事之宜此以謂隨所處而皆得乎其
宜之道也蓋在君為仁在父為慈在子為孝在臣為忠
在朋友為信而與二帝三王之曰中曰仁曰敬曰誠實
相表裏義之為用大矣哉臣義初繇進士擢中書舍人
其可以任重而致遠者蓋簡在上心久矣是時列官侍
近者率一考再考輒陞遷以去獨臣義更三考歷十餘

歲不遷而眷顧之恩益盛豈非欲其朝夕左右以練達夫謨謀之精微政治之本末以為他日聖子神孫之所資乎自古帝王凡一命一令必為天下後世慮而欲付以重任者必授以要道臣義之所以名明聖之心其在於此乎其後臣義陞吏部侍郎皇上臨御之初簡任六卿即以為吏部尚書暨冊立皇太子慎選輔臣又命無詹事府詹事車駕屢幸北京皆留以輔監國所以付託之至重矣而臣義明達政務秉恭摠誠知無不言言必

適宜雍容簡肅於時倚重焉此誠出於皇上之明信而任之而必本於高皇帝之明蚤識而預成之矣近世人主如宋太祖能蚤識張齊賢可為相既以遺太宗然必黜之於外俟太宗自用豈以誠待人之道觀高皇帝於臣義之事嗚呼聖謨遠矣惟臣義欽承天寵所以圖惟克終光遠有耀者繼自今宜何如其至哉臣士奇與臣義同朝久且相知厚故願有所祝規焉

恭題呂少卿欽和御製嘉禾詩韻後

永樂初太宗皇帝閱中秘書得太祖皇帝所製嘉禾詩
命刻石摹拓裝潢為軸賜諸王及京師三品以上文臣
翰林近臣六人國子祭酒司業而止士奇時叨職內制
亦預被賜凡當時被賜者皆獻歌頌贊揚太祖皇帝神
功聖德始終敬天之誠與太宗皇帝表章先志惓惓繼
述之孝雖天地造化之妙有非繪畫所能彷彿其萬一
然臣子至情固有不能自己者矣今獲睹大理左少卿
呂升前為山西按察僉事時所擬恭和之作誦之再三

盖同乎臣子至情之不能自己者也升文學篤實踐履端潔有忠君愛民之意盖士林所重云

恭題馮敏所藏賜名御書後

洪熙元年四月五日禮部進事狀上覽其後有主事馮智安名親御宸翰題其外易其名曰敏敏拜賜退以御書裝潢為卷間示士奇士奇謹拜手稽首觀畢為之言曰甚矣皇上之仁愛其臣也勵之所以成之成之盖有所望之也敏者勉焉力進如恐不及之意敏則事無往

而弗成是以孔子教學者嘗曰敏於事又曰敏於行又曰敏則有功門弟子服膺師教而不敢忽也皆記之簡冊孔子之言本諸傳說蓋為學問德行事功而不能敏將有厭倦作輟之患或墮於無成聖人之所為深慮也皇上之訓又本諸孔子敏敬之哉天下之事有志則成無志則隳敏者所以遂其志也探驪珠於不測之淵一其志斯得之况立身行道者乎敏敬之哉今朝廷孜孜簡賢任能與圖化理敏亦日進顯用未已其何可弗加

之敬以仰副聖天子之望敏竦然起曰不肖敢不蚤夜惕厲以求無忝於寵命惟是一時儕輩有尊君所賜名而不以呼者惟父之執其圖之士奇素往還馮氏父子之間又愛敏之能謹其操行而欲相成之於遠且大也忘其僭踰輒字之曰欽訓云

恭題勅諭致仕官羅崇後

右永樂二年正月十七日勅江都縣典史致仕臣羅崇一通臣崇既裝潢成卷又五年上巡幸北京詔吏部驛

召天下致仕官暫任以政崇至得署麻城縣且行出此
勅示臣士奇屬識一言臣士奇俯伏端誦仰惟皇上達
孝推恩優禮耆舊聖德隆盛而崇老退遭逢榮幸欣躍
感激懷報當何如哉孔子曰君使臣以禮臣事君以忠
忠者臣道之當然今皇上宵旰圖治孜孜焉安民之為
急崇是行誠能精白一心以宣揚德意惠撫其民使咸
獲生遂庶幾盡為臣以忠之義以不忝負此勅而寶藏
之傳於子孫光輝烜赫其有窮乎崇尚懋敬之哉

恭題賜本歐陽文忠公集後

歐陽文忠公集在宋有數本惟周益公家所編刻者最精備此本近年新刻於春坊時東宮殿下監國之暇究心經史而凡歷代名臣奏疏悉取覽閱尤愛文忠議論切直文章淳雅遂命刻之板成詹事臣義臣忠諭德臣士奇皆獲賜一本此臣士奇所得者也視益公本又精備矣總目年譜一冊居士集十冊外集七冊易童子問一冊外制一冊內制二冊四六三冊奏議五冊雜著述

六冊集古錄跋尾四冊書簡三冊附錄二冊總四十五冊

恭題勅建太學碑後

洪武十四年改建宣聖廟國子監雞鳴山之陽明年成翰林學士臣宋訥奉勅撰碑文鑄印局副使臣詹希元奉勅書并篆刻石在監中永樂十三年臣士奇始得此本惟我太祖高皇帝惓惓敬禮先師興學育才舊時朝臣今在者歷歷能道其事此碑所載僅什之一二豈出

於當時聖心謙抑而然乎故事惟翰林之臣散官署於其職之後訥此文獨署於職前殆不可曉

恭題御製修孔子廟碑後

此永樂十五年詔修曲阜孔子廟成上親製碑文賜之者也臣聞詔下之初數命所司必精潔必堅固毋或瀆慢由是臣工欽承益謹久乃告成蓋我國家聖聖相承於尊禮先師無所不用其極也此碑中書舍人臣朱孔易奉勅書刻石此本衍聖公臣孔彥縉以贈臣士奇者

謹識而珍藏之

恭題蔣院判用文所得令諭後

仁宗昭皇帝監國時賜太醫院判蔣用文宸翰用文之
子主善裝潢成卷以士奇當時舊臣屬志一言蓋聞之
周詩曰於戲前王不忘此言先王盛德在人而人思慕
之愈久而不能忘也惟昭皇帝德澤沾被天下天下之
人傾心仰戴升遐之日萬方興哀如喪慈父而至于今
追思感慕之不能已何也聖人之心夙夜孜孜唯奉天

恤民而幾務之餘禮賢延士從容顧問無非咨求治道
詢察民隱而咨詢之博蓋不止於輔弼之臣而左右侍
從能正言以效裨益禮遇之厚始終不間此道德所以
益崇恩澤所以益廣感人之心所以深且固也于時用
文以儒醫事上敬慎小心燕閒奏對屢效忠益未嘗不
嘉納焉而德意久不衰此卷其臨終所被賜也用文既
沒贈太醫院使賜諡恭靖又親為文祭之曰亦有嘉言
以裨予治忠愛之懇簡在朕心遂詔有司治祠墳又命

主善世其父之官非用文素效忠益其何以得此聖仁
之心至矣哉於戲為君得賢臣易為臣得明主難如後
之為臣知蔣氏當時之所蒙被而欽仰天德思慕無已
盖末有不興夫生晚後時之嘆於戲至矣謹拜手稽首
志于後云

恭題仁廟御書後

永樂七年太宗皇帝初巡北京翰林修撰王直留侍仁
宗皇帝監國與聞密務甚見獎重仁廟屢顧大臣論近

侍賢而文者曰王直何可多得十一年直當扈從北京
其後監國侍臣有不能了事者睿意未嘗不思直直父
瓊州知府伯貞入見以直故思意曲盡臣士奇時為春
坊諭德皆所目覩惟聖明知人而至仁如天有非言語
所能彷彿於戲龍馭遠矣右宸翰四紙直所寶藏今裝
潢為卷永示子孫以臣當時舊人屬志之其第二紙實
臣奉命齎賜者追思往昔何勝愴然敬為之志

恭題某給事中所藏勅書後

皇上嗣統改元之第一勅所以誠諭中外文武之臣者
諄切而著明矣皇上此心即天與祖宗之心也勅下至
今六年中外之臣有能欽體上心致敬於奉法愛民而
進其祿位者蓋比比焉其或不能又縱私以厲民未有
不遭罹斥黜然亦鮮矣以此見有道之世君子衆而小
人寡且賞善罰惡之行至公也給事中臣某寶重茲勅
裝潢為卷以朝夕覽閱而自勵其仰體聖心加切也某
通才而敏識廉慎而恭確其所進誠未可量臣士奇獲

拜觀焉謹拜手稽首識于後以俟

恭題被賜誥勅刻本與姪子弼

臣士奇既刻石姪子弼適至遂拓本畀之使圖不忝云

易會通

易會通十四卷元番易董貞卿李真輯五經先儒所論著者易最多而精義悉具此書至於經傳古今之辨先儒傳授之詳披卷瞭然可為易書集大成者也吾家所有者釐為六冊自吾授徒以來市書此最初得云

易學啓蒙

朱子易學啓蒙惟胡方平本最善洪武乙卯司倉伯罷官歸見余初讀易出一編以示曰孺子勉之易精蘊具在此書即熟程朱傳義後宜熟此吾藏以待汝即胡氏啓蒙也無幾為人竊取伯父不樂累日至形於詬詈余後出教童蒙始得此本追惟伯父所以拳拳於不肖恩德為何如哉

朱子易說

右晦菴先生易說廿三卷分為三冊先生於易自本義啟蒙之外凡雜著及門人所記口授之言其精義皆在此書蓋先生之孫鑑所會粹而學易之士所不可無者

書傳纂疏

右書傳纂疏六卷分三冊元新安陳櫟輯櫟字壽翁號定宇今讀書傳者率資此書及董鼎纂註吾外氏有書傳會通尤詳備而今學者多未及見余雖見之亦未及錄也

詩傳通釋

詩傳通釋元安城劉瑾輯凡二十卷余家四冊其采錄各經傳及諸儒所發要義又考求世次源流至明且備蓋會通之書也吾家五經皆授徒以來所置蓋余少時獨有易傳義及四書集註耳書詩禮經春秋左氏傳皆從人借錄以讀既不易得書又日有衣食之累於心雖學不能得如意也後出授徒以至於今仕得祿衣食有餘輒以置書積久卷帙頗富而甫四十困於疾病氣日

益衰目日益昏雖其志尚在而精力強勉不前不勝自憾也故學者必在勉之於少壯之時苟逸居溫飽而不自力或有蚤衰如余者徒抱無及之嘆奚益哉

春秋胡傳纂疏

春秋胡傳纂疏三十卷元新安汪克寬輯余家十冊蓋左氏公穀之外漢以下儒者說春秋甚多唯伊川程子為得聖人之旨惟胡文定公實傳程子之學朱子曰文定春秋明天理正人心體用該貫有剛大正直之氣故

近世治春秋者兼主左氏公穀文定四家三傳舊有註
疏此書專主胡傳云

春秋會通

春秋會通廿四卷余家所藏者分為四冊吾郡安福李
廉先生所輯先生字行簡元至正壬午以是經舉擢陳
祖仁榜第三甲進士官至贛州路信豐縣尹後遇寇亂
戰敗守節死江西行省上其事屬南北道梗不能達故
當時旌褒之澤不及國朝修元史時先生相知者無在

當路有司又不知采錄以聞故不得列諸史傳於是世之知先生益少矣夫士君子所為求安於其心而已豈計其在外者然先賢後學所取正也曷可泯而弗著哉今世所傳先生死事惟見於元江西廉訪使韓準求贈謚咨文余近得於翰林庶吉士周忱家謹錄置此書之後使後之學者知先生於春秋不徒能明之蓋煒然於科目有光也

春秋左傳二集

二首

吾友鄧存誠初舉進士時許惠此書未得也蓋進士皆
觀政諸司無暇相即而自是益契濶既為御史秩滿陞
山東按察使又陞布政使歷十五年始以見納朋友不
愆於信類此不可以忘故識之

春秋左氏傳六十卷杜預註孔穎達疏吾家此書十六
冊蓋福州府學板得於劉伯塤員外云

春秋本末

春秋仲尼因魯史之舊筆削之以著法戒春秋本末我

太祖高皇帝命儒臣因仲尼之舊彙粹之以便覽觀首
天王以尊正統先中國而後夷狄義例甚精皆聖制也
刻板在太學余家所藏廿冊得於廬陵晏彥文

左傳博議

東萊先生左傳博議考年譜乾道戊子成此書吾家一
冊十五卷題曰精選則知其所著非止乎此也

儀禮逸經

此書刻板在北京國學彭士揚為典籍蒐閱宗文閣不

完書板而此獨完即日印惠親友蓋已廢棄六十餘年其顯晦固有時哉

儀禮圖

右儀禮二冊圖六冊陳嗣初博士所贈熟賓羅儀範為之點對錄補云

禮記集說二集 二首

禮記集說十六卷陳澠著吾家所藏者釐為三冊此書出於孔氏之徒而雜以呂不常及戰國處士漢博士之

言其旨不能皆粹而錯簡亦多近世吳文正公澄著禮記纂言多所更定其篇次亦各以類從如曲禮內則少儀玉藻深衣月令王制文王世子明堂位九篇為通禮喪大記雜記喪服小記服問檀弓曾子問大傳間傳問喪三年問喪服四制十一篇為喪禮祭法郊特牲祭義祭統四篇為祭禮其通論凡十二篇析為五類禮運禮器經解為一類哀公問仲尼燕居孔子閒居為一類坊記表記緇衣為一類儒行為一類學記樂記為一類大

學中庸別出合語孟為四書投壺奔喪二篇歸之儀禮
正經不雜於記冠禮昏義鄉飲酒義射義燕義聘義六
篇皆所以釋儀禮者別輯為傳以附經後於是一書之
中類分章別條理粲然誠不刊之典也臨川故有刻板
兵後不存近聞吳司業德潤家有此書方謀借錄未及
而厄於火遂不復得惜哉姑記所考定篇次於此以見
大槩云

此詹事府張錄事教子舊書於初來北京無書始從借

閱張君二部遂以此見遺凡三冊云永樂壬寅八月識
是日上丁釋奠先師陪禮初退

書禹貢傳註詳節

書禹貢傳註詳節先友湖州府經歷郭慶宜先生刪節
傳註為之以便記誦者也先生治書經嘗從元進士戴
邁養高講習其授受有自云

五經旁注

易書詩論孟旁注廬陵李省中先生作簡明切當便於

初學先生名恕與龍麟洲劉水窓同輩行余識其從曾孫思益為沭陽縣教諭其家已不傳此書余所畜總六冊書坊板頗有闕誤

古文孝經說

右古文孝經說宋元祐中秘書省著作郎兼侍講范祖禹淳夫經筵所進書也今刻板在成都吾家一冊得之吉水黎教諭德讓

吳文正公考定孝經

吳文正公考定孝經刻於新淦劉氏卷首有吾郡劉雲章先生敘此書蓋因朱子刊誤而以古文今文校定之訓釋明切賢於舊註遠甚

孝經經傳直解

元延祐中錢天祐著孝經經傳直解蓋以朱子刊誤為主其黜閏門章及合五刑章與上章為一則從草廬吳氏考定本此書當時已板行有翰林承旨程文海敘洪武庚午冬余自武昌歸守風盤塘借錄於隣舟上虞張

肅急遽其直解不及錄惟錄其經傳如右云

易主意

易主意一冊元臨川鄉貢進士涂潛生著專為科舉設
近年獨廬陵謝子方有之以教學者於是吾郡學易者
皆資於此余少嘗錄之後失之此本萬安訓導郭公承
為余重錄

易義二集

二首

右易義一冊建寧趙友士以教其徒者趙故建寧經師

余為審理時趙為伴讀往還相好也是編吳司業德潤得之以見遺者

右易義三冊初學所集者雖淺近無所發明而不倍理偶得之姑存之

解李通易義


元盛時吉水解氏治易有名江鄉間而觀我求我最著李通其兄弟也此編平正典實惜多闕文

書卓躍

書卓躍二冊元永豐陳雅言著專為科舉設今南昌有
刻板余得之雅言之孫彞訓今為中書舍人

詩解頤

詩解頤四卷國朝文淵閣大學士朱善著南昌有刻板
吾得之兵部侍郎盧淵凡二冊盧朱之同郡人



東里續集卷十六

欽定四庫全書

集部

東里續集卷十八

詳校官檢討_臣羅國俊

中書_臣劉源溥覆勘

總校官進士_臣楊懋珩

校對官中書_臣范鰲

謄錄舉人_臣朱錫彤

欽定四庫全書

東里續集卷十七

明 楊士奇 撰

跋

四書集註二集

二首

右四書集註其句讀旁抹之法無取勉齋黃氏北山何氏魯齋王氏導江張氏諸本之長宣城張師曾為之叅校加以音考蓋今最善本也刻板在常州府學此集六冊永樂十年二月余奉命考會試常州府學教授金原

祺時預同考余從求而得之者也其刊刻亦間有錯誤
右四書集註三冊刻板在鄞句讀一用黃勉齋法又有
熊勿齋標題便於學者蓋善本也勉齋名榦字直卿朱
門高第勿齋名禾字去非受學進齋徐幾子與子與學
於節齋蔡淵伯靜淵源之正如此此書吾得之春坊司
諫周冕汝服蓋鄞人云

四書輯釋

四書輯釋倪士毅編朱子集註四書之後儒先君子著

述推廣發明之者無慮十數家而今讀集註者獨資集成及此書為多他蓋不能悉得也集成博而雜不若此書多醇少疵也憶余少貧得書甚難十二三從里人劉文璧乞得論語輯釋半部蓋斷簡也寶之如拱璧後授徒武昌始得此本凡九冊夫知吾少時得書之難其必知所愛重也

大學中庸日錄

右大學中庸日錄元吳文正公門人袁明善述其師授

之旨而為之者也有文正公補大學第五章傳文此冊
吳司業德潤以見遺者

孟子節文

右孟子節文一冊考翰林學士劉三吾題辭蓋三吾等
奏請而為之者也總一百七十餘條此外惟課試不以
命題科舉不以取士而已刻板在太學

大學衍義三集

三首

宋儒真文忠公著此書所以備有天下國家者之法戒

也為人主及其輔臣皆不可離此董子論春秋謂有國者及為臣者皆不可不知余此書亦云

右大學衍義凡四冊余授徒武昌時而得其末一冊相姪以歸讀而厄於火今存三冊藏之以俟補完

宋真文忠公大學衍義四十三卷著述之意見公所上劄子及敘蓋其為書廣大精密綱目畢備有天下國家之任及為臣欲致其君於唐虞三代者必考之於斯焉

四書管窺三集 三首

閩黃澤敷仲永樂壬辰余校文禮部時所選奏進士也而未嘗識之其佐外藩也嘗見其封事惓惓愛民之意卓然今之賢方岳也今從吾友朱與言寄惠此本因併志其人云

四書管窺四冊永嘉史伯璿文璣著蓋出饒氏輯講何氏集成胡氏陳氏發明金氏考證許氏叢說倪氏輯釋之後其論諸家之失皆平正的確刻板在永嘉郡學吾得之黃宗豫學士聞黃州郡學近嘗刻此書不知何如

也

四書管窺舊刻板在永嘉葉琮洪武乙丑進士知黃州府又刊置府學吾友吉水周君公明為黃岡縣教諭從求而得之總五冊二本余皆有之於是補闕正誤得互相資也

理學類編二集 二首

此書及策要宋史略元史略皆刊板在清江退菴學士之壻袁鵬所惠清江三十年前老師宿儒多在獨梁張

二先生有著述而其鄉又有好事者為刊刻以傳文物
遺風故未泯也

此編出於臨江張九韶先生而吳文正公之孫伯尚為
之序蓋臨江有刻板使學者一覽而得夫天道性命之
旨不為無助吾得此於恂如云

十一經問對

此書為小學設所謂十一經者書詩春秋儀禮周禮禮
記論語孝經大學中庸孟子不及於易者非小學所及

也

孝經吳文正公校定

此編及私錄一冊皆文正公之孫徐州判官子尚所寄
惠者公之後以先世通家故皆與余往還所刻先世文
字皆數見遺而子尚寄此未久遽聞其沒甚可惜也

四書待問

四書待問一冊八卷元臨江蕭鎰南金編為科舉之學
設也元場屋有四書疑問國初三科猶然洪武甲子始

改為四書義此書余初習舉業時受之司倉伯今吾所
畜書獨此最久也

元程文四集

四首

右詩禮記春秋三經義雖斷簡然元前七科之文又選
其精者也

右元前八科程文不完獨有四書疑及易義一卷耳然
具載當時程式可備稽考

右元至正二年江浙江西湖廣三省鄉試及會試廷試

選中之文而擇其佳者蓋元順帝嘗罷科舉至是始復云

右延祐乙卯會試程文一冊不完是編總十卷今存三卷首卷蒙古色目人答四書疑及策二卷三卷皆漢人南人答四書疑考之蓋當時選刻者先待制所答四書疑吾家兵後錄本止存一篇此篇二篇皆在永樂乙未春吾得之天台張廷璧

元延祐初科會試程文

內左榜闕四名闕文更多錯誤尤甚蓋匆匆不及對過也

策要

此集退菴之壻所惠

朱子語略

余少則聞先生長者言學者日誦五經四書諸史外閒暇宜玩朱子語類一日過水南段福可福可先待制侍史其家有語類二卷福可謂此楊氏故物即以歸我雖

不完然始識此書喜持歸先宜人見之泣指所題簽帖
語不肖曰小子敬之此汝父手筆也無幾先叔子超携
入灌塘尹氏館中失焉自是所至求語類全書不可得
此集二冊特語畧耳朱子門人楊與立編刻板在北京
國子監永樂庚寅楊庶子扈從還以見遺所闕什一得
鄒侍講本補錄遂為完書總二十卷二千四百八十條
凡學者明善誠身之方大要具是誠能身體力行之可
以馴致乎古人然語類固學者不可少哉

白虎通

錄白虎通一冊洪武乙亥春余客武昌偕蔣隱溪父子
遊東山得諸野人

忠經

忠經一冊漢南郡太守馬融撰其篇義篇數皆依倣孝
經鄭玄為之註蜀中有刻板余得之德讓云

武經

武經七書孫子吳子司馬法唐太宗李衛公問對尉繚

子黃石公三畧六韜是已吾家七書總一冊獨孫子有
魏武註得之江夏宋惟憲云

說苑二集

二首

說苑二冊余得之今大理寺丞鄒師顏聞刻板在四川
視袁州本其優多矣

說苑廿卷漢劉向采傳記百家所載言行可為法戒者
類錄之為此書余家二冊刻板在袁州訛闕蓋多得之
友人宜春令蔡胄用嚴蔡操行潔清其在官市此書幾

於李及之白集吾從而得之宜在所愛重也

列子

列子八篇古列禦寇書唐號冲虛真經宋加至德真旨
道家其見寵於後世益久益重其為書柳子朱子論之
至矣余家錄本一冊洪武庚午冬自武昌舟還阻風雪
盤塘累日無所為鄰舟人上虞張肅有此書遂借錄之
出一時草率後欲錄過未暇也

五子

老莊荀揚文中世所謂五子然老莊道家荀揚文中皆
儒家而未醇者吾家五子總七冊

道德經

草廬先生註道德經一冊余得之先生曾孫子常後世
註是經者非一家要之此註為得老子本意雖老子之
言儒者不取若所謂治國如烹小鮮佳兵不祥之類聖
人復起不易其言也

戰國策

古戰國策嫠人吳師道以鮑彪校注多謬誤而重為校
正者也後世文章家以其先秦之言皆愛重之然有志
於聖賢誠意正心之學者無取乎此也蘇州有刻板吾
家四冊得之吉水周敘

小四書二集

二首

小學之教其廢久矣歛人朱昇輯方逢辰名物蒙求程
若庸性理字訓陳櫟歷代蒙求黃繼善史學提要為一
編謂之小四書以教初學庶幾古人遺意其上及旁皆

有註釋尤便於教者刻板今在婺源余得此冊於婺源秀才汪樵

此編永樂丁酉秋九月得之陳克永典籍

敘古千文

右胡致堂敘古千文嘗聞長老言先諭德五歲侍先待制教讀此書已曉知大義洪武庚申余始求得此書於蕭尚魯所蓋生十有五年矣不肖頑鈍廢墜家學類如此後之人可以為戒也既得又三十五年為永樂甲午

卷十七
八月六日識

太極解

南軒張宣公太極解余錄於廬陵清湖羅德崇先生先生名獻先待制同年寧都州判求師之從子少從游先祖兄弟與先諭德相好為人狷介不苟合嘗為武昌府學訓導時余客武昌無日不辱見過所畜雖片簡尺牘無不辱惠教一日酌余江濱小樓醉留宿覺夜已二鼓起燒筍瀹茗論太極先生誦此解甚熟余時未有本也

遂請錄之明日就他處求本叅對無一字誤因竊歎前輩讀書用功切實如此非後學所當師乎自余錄此本至今二十有四年矣用志之以示後人

朱子語錄

昔陳忠肅公每得明道先生文必冠帶而後讀然則讀此書者其可以不加敬哉

楚辭二集

二首

楚辭出於忠臣愛君憂國惻怛之誠故先正以為三百

篇之續此編余得之劉伯埏云

余少貧無書間從人假借甚難得既壯頗置書而來借者輒不靳而楚辭借而不歸者凡五矣余前後所遇如此甚可嘆故志以戒

史漢異同

史漢異同廬陵劉會孟先生作欲知西漢文章之妙者必考於此蓋先生用功遷固最深前所未有此冊不完德安貳守羅先生手筆也

資治通鑑釋文

右資治通鑑釋文一冊宋右宣義郎眉山史炤見可著
而天台胡三省通鑑音註有辨正其誤六百六十餘條
此書余昔得之亡友陳一敬云

史畧釋文

右史畧釋文一冊余在京師并史畧二冊皆得於鄰舍
之罷官去者憶年十四五坐貧不得已出為村落童子
師以謀奉養之計而急欲此編及十書直音是時二書

市直百錢然不能得也家獨畜一牝雞數歲矣先宜人命以易之今致書頗多而先宜人棄背已二十年不及見也嗚呼慟哉

諸儒史評

諸儒史評五冊所選擇皆精確前大理寺丞山東耿通家書耿死其子盡賣家物為路費以歸此書其隣之隸以五百文市之後余聞之益以五貫從隸得焉時書肆非十貫不可得夫有子不教之學問使賤書如此孰之

過歟噫

隋書

右隋書詳節一冊自一卷至十卷紀及十志耳後闕傳
十卷洪武庚申余館山東蕭尚魯先生塾中得之者也
通鑑續編

右通鑑續編六冊得之國子司業張智玄畧余識張時
已老矣洪武中嘗為禮部侍郎其少居江右最久猶及
親炙亡宋老儒知當時事間與余言此書有謬妄處如

載文天祥請為黃冠之類大不可信其說甚詳不及備載然此事本於宋史天祥傳

史畧二集 二首

宋進士吾郡曾先之編史畧以便初學而大字刻本尤便於老者之目此板在國監吾家四冊惜其間多錯誤耳

史畧二冊書坊舊本永樂丁酉余在京師隣家有罷官去者留以見遺蓋書坊新刻本多錯誤余家有國學大

字本亦然皆不若此本錯誤差少也

通鑑總類

通鑑總類者宋沈樞編分一百七十一門總二十卷刻板在蘇州郡學余初得十二冊於晏彥文而闕其八冊吉水周功敘自蘇州為余印補遂為完書此書無雜不足觀而周伯溫以擬袁氏紀事本末過矣

通鑑綱目書法

通鑑綱目書法五十九卷六冊吾得之國子司業張智

玄畧頗有缺折未補錄此書吾郡永新劉水窓先生著
先生諱友益字益友與龍麟洲李省中蕭芳洲同輩行
其平生精力萃於此書揭文安公敘之曰其辭公羊穀
梁其義春秋其志朱子蓋甚推重云

通鑑綱目凡例

通鑑綱目凡例十九類朱子所定讀綱目者必得此而
後灼見古人精意之所寓今太學有刻板余家一冊鄒
仲熙侍講所惠又有鈔錄汪克寬凡例考異在後

元史節要

元史節要者續曾先之史畧以便初學耳又有元史畧其體不同二書皆出臨江全史刻板今在大學

通鑑綱目

朱文公因司馬溫公資治通鑑別為義例作綱目五十
九卷至矣哉其春秋之意也其條貫皆出文公而綴緝
於諸門人之手間有異同或者亦鈔錄傳刻之失乎吾
居京師與給事中林從為隣其出為陝州判官賣家具

給行費余從市得此書凡十六冊

通鑑紀事本末

通鑑紀事本末四十二冊此書宋袁樞機仲編吾家文節公為之序凡四十二卷二百三十九事皆關涉大端始末畢具觀者便之吾居京師時市於晏彥文蓋吾授徒廿餘年積其勤力僅得五經四書及唐人詩文數家而已子史皆從人借讀皇上龍飛之初擢官翰林俸賜有餘不敢妄費一以置書自是簡帙始富矣夫吾之後

世知吾所畜書皆出上恩之所致其必能敬重而寶藏之也

元史畧

元史畧及節要皆出臨江體制不同如不得全史得二書無看亦可知其大槩矣

續宋編年資治通鑑

續宋編年資治通鑑起太祖至欽宗十八卷禮部員外郎無國史院編修官李燾著續宋中興編年資治通鑑

起高宗至寧宗十五卷戶部架閣國史院檢討無編修
官劉時舉著宋季三朝政要起理宗至少帝五卷無編
著人氏名二王本末一卷則取諸陳仲微所錄總三十
九卷吾家治為四冊總題曰宋鑑此本節畧已甚又多
差誤蓋近年書坊翻刊文籍簡省率畧多如此不獨此
書亦可為人心風俗之一慨也

晉書

晉書百三十卷唐太宗命房玄齡等因舊史再加譌次

紀傳論太宗御製之外其餘皆出顏師古孔穎達之徒
志出于志寧之徒而天文律厯一出李淳風朱子極善
其天文志吾家晉書廿六冊永樂乙未族人忠襄公九
世孫東平知州之子民服舉進士在京師泊然無他嗜
好惟志學問聞國監有書板悉貲以求印余助之工力
以此見贈云

三國志

三國志晉陳壽撰宋文帝以其過畧命裴松之博采為

之註後世以裴註過繁而合壽所書裁定之為一家者
凡數人而皆未就葉水心曰壽蓋盡取為書矣註之所
載皆壽所棄者且謂裁定者為輕議害事又曰壽高處
逼司馬遷而勝班固其重壽如此夫紀魏而傳蜀者葉
固不能獨右壽也近世廬陵貢士蕭常正其名為續漢
書起昭烈至少帝為紀魏吳皆為載紀而擇裴註之善
者併書之蓋至當矣周益公為之序然其書今世學者
少見也吾家三國志三十冊刻板在大學

前漢書

班固撰前漢書十二帝紀八表十志七十列傳其八表及天文志固妹曹世叔妻昭之所成也世稱良史必曰遷固固才不及遷也若鄭夾漈譏固無學術專事剽竊斯論過甚矣哉余家二十五冊國學印本

後漢書

范曄後漢書蓋刪取劉琨謝承薛瑩劉義慶等漢史為之然曄所成紀傳耳志未成伏誅後人取司馬彪所撰

補之非眩誤也余家所藏四十七冊國學印本

史記

史記百三十卷司馬子長才識高邁文章疏蕩奇偉至
於狀寫之妙超然獨出也朱子謂其麓率且疑史記當
時未刪改脫稿吾郡劉中齋云史記初看甚有羨字羨
句再看但覺好三看元無一字一句羨減一字一句即
不佳豈求之篤者獨得之深耶吾家八冊刻板在太學
吾初印此書及文獻通考皆有闕板歲餘弗克補錄永

樂二年友人湯如川曾與賢余學夔蕭省身獨孤樂善
歐陽允俊登第後為庶吉士在翰林數就吾家借讀一
日節假欣然來過取二書闕者共為補錄及暮而畢其
簽帖悉如川書也今如川與賢允俊不可作矣每覽手
筆慨然興懷

兩朝實錄纂修始末

右恭修兩朝實錄始末一卷臣士奇所錄勅下之初臣
通率師往征交趾叛寇不及預事事未半臣淮引疾去

既就緒戶部尚書臣陳山禮部尚書臣張瑛皆以無學
士職奉命預事凡歷六年始克成書表詞臣士奇所撰
書奏恩旨甚厚命吏部敘勞進秩禮部宴賚於是論勞
賜白金寶楮文綺鞍馬有差然自纂修以下至雜執事
均進一官蓋吏部不復差別勞績也臣士奇謹志

宣廟實錄纂修始末

右恭修宣宗皇帝實錄本末蓋歷四年始克成書表詞
臣直所撰既奏恩命加厚臣輔加號與祿臣士奇臣榮

遷少師臣溥陞少保臣直臣瑛陞禮部左侍郎無官悉
如舊纂修皆陞官一級凡主事御史評事皆入翰林餘
參對催纂謄錄等官皆陞祿一級布衣士謄錄者皆授
試中書舍人賜白金寶楮文綺鞍馬有差皆上所親命
不出有司秩乎有倫而不紊蓋軼於前矣用謹志之臣
士奇謹志

兩漢詔令二集

二首

右兩漢詔令三冊刻板在太學張守初真人來京師以

上清紙貺余曰少助書簡之用余素寡交雖有至親交者亦懶於作書而計其紙可印漢詔令一部遂託歐陽助教允賢成之此書是也每退朝閉戶謝客坐南軒翠竹之下清風徐來獨取此書因其優柔深厚之詞以考夫寬大忠愛之意反復涵泳亦一快哉

右兩漢詔令西漢十二卷宋吳郡林慮輯東漢十一卷四明劉昉輯元蘇天爵合為一書又取洪咨夔兩漢詔令總論冠諸卷首洪亦嘗輯此書而今不傳余家三冊

頗有脫誤誤者多就考正脫者雖補錄未完也

楊鐵崖三史正統辨

前年病中有遺予此編者不記其人其間多闕誤頗為正之蓋吾舊有貝廷臣著鐵崖傳載此文差詳辨末云私著其說以俟千載之君子而傳云欲獻不果此編又有表表謬誤尤多不知果何如也

歷代大統易見

右歷代大統易見一冊舊錄於王詢謨不知何人編王

云在臨江邂逅錄之比年於內府見有進此書者亦不記為誰作也

宋史畧

永樂甲辰十月甲子淦人袁鵬惠此書樸學齋志

文獻通考

文獻通考三百四十八卷宋相馬廷鸞之子端臨所輯間有複出刪治未盡然立體正大載事詳覈有益實用非其他類書之比蓋類書如冊府元龜太平御覽猶或

傷於汎濫不切或雜於怪異不經況其下者通考刻板
在太學吾家所有凡四十冊郊社考一冊嘗為行儉借
去而厄於火欲印補更數歲未暇一日過沈民則修譔
見有斷簡數冊則此書也郊社考在焉紙板視吾家所
有無二遂乞補之亦奇遇哉

玉海

玉海二百四卷分為六十七冊又有六經天文編一冊
周易鄭注周書王會詩考共一冊詩地理考一冊踐阼

篇漢制考共一冊漢藝文志考證一冊通鑑答問二冊
通鑑地理通釋三冊急就篇二冊姓氏急就篇一冊小
學紺珠四冊總八十四冊此書皆宋王應麟輯刻板在
太學玉海本為應博學宏辭者設而其孫云未脫稿豈
亦未成之書耶頗聞松江府學亦有刻板

稽古定制

右稽古定制一冊我太祖高皇帝命儒臣考唐宋制度
酌其中示法於民者也孔子曰安上治民莫善於禮又

曰君子以辨上下定民志惟禮制行而後民志定故聖人之為天下國家者必重焉永樂癸未臣士奇在京師始遇此書謹錄而識之

賜諡錄

余客武昌時遇宋賜諡編於湖廣參議吳文家既借錄之余又嘗集錄唐及元所賜諡遂合為一編總曰賜諡錄然有私諡者亦頗附載焉

通典

通典唐宰相杜佑著蓋因劉秩政典三十五篇之舊而廣之又參以新禮凡二百篇分食貨選舉職官禮樂刑法州郡邊防八門今少見全書士大夫家所有者皆節本余家四冊近年書坊新刊蓋又節矣

官制沿革

右錄官制沿革一冊先師海桑陳先生家書也其中有先生手筆士奇少孤貧先生以先考妣故召而教之年十二三習舉子業而於古官制不能知也遂予此書蓋

於此書今四十年矣手澤宛然於乎痛哉謹識

方輿勝覽

方輿勝覽三卷不著編次者氏名蓋元之人作也時又有輿地要覽二書皆出一統志互有詳畧而要覽尤簡又不載沿革今書坊皆有之吾家獨有勝覽三冊其末卷尾題曰大明者後之人改之也

西昌志

右西昌志宋淳熙三年知縣事陳秀實命貢士嚴萬全

倪求已會粹為之者也淳熙至今二百四十三年未有
繼作豈非鄉邑欠事此集劉仲無梁叔莊共錄以寄余
者蓋以余嘗有志乎此姑識而藏之

桂林郡志

右桂林郡志四冊凡三十卷歐陽允和以見遺者而闕
二卷桂林舊有志洪武中教授陳璉因而續之其間論
夷獠則必載昔人制馭之說論瘴癘則詳列昔人治療
之方仁者之用心也璉字廷器今守滁州有惠政民甚

戴之聞亦修滁陽志然余未及見也

茆山志

右茆山志二冊太子少師姚公所惠其編刻皆不苟

西域記

右西域記一冊吏部郎中吾郡陳誠子魯著子魯永樂十一年奉使西域所歷哈密和卓巴實伯里哈里賽瑪爾堪諸番之地凡往復踰二歲而留哈里最久故特記之詳焉子魯又為余言諸番風俗大抵與哈里相似云

契丹志

右契丹志一冊不完忘所自得但記洪武辛酉假館洵金袁氏同薊城張子震觀此書作詩寓慨歎之意於今三十有七年雖斷簡不失也蓋余平生於古書遺文雖殘缺不完未嘗不保愛之

吉安府志

右吉安府志一冊蓋余與錢檢討習禮在京師同有志斯事遂以所有鄉郡舊志及於前輩文集中采錄近事

而附益之未幾習禮被召赴北京而余亦以公務無暇
此所錄者如城郭官府之類於郡中頗詳未及諸邑餘
諸類亦皆未就也獨科目一類後得陳村民先生吉州
進士錄補之諸邑皆備云

東里續集卷十七

欽定四庫全書

東里續集卷十八

明 楊士奇 撰

跋

宋名臣言行錄

右宋名臣言行錄七冊今書坊本得之黃學士宗豫誦
嘉言仰賢範樂余之得師也其間微有錯簡蓋傳刻之
誤

文公家禮

右朱子家禮一冊今士大夫家多遵用之間亦有置疑其間者余偶於朱季寧家得張南軒三家禮範後有武林應本中所識及家禮辨數條其論皆有理因錄置於後云

圖繪寶鑑

此吳淞人所輯可謂博矣而世次彙亂可笑淞近年又有輯古今能書者為一編彙亂尤可笑後人作事多忽畧莫甚於此又可慨也

吳文正公外集

目錄有雜詩一卷而卷中無之蓋未刻云

爾雅

爾雅三卷古小學書初無深義世謂周公作非也朱子曰爾雅取傳註以作後人乃以雅正傳註吾家一冊郭璞注

經史動靜字音

經史動靜字音蓋以便教幼學者然今南方學者多忽

畧不究余在武昌遇之張從善所故特錄以歸時洪武甲戌歲也又二十有五年月日識

埤雅

右埤雅二冊總二十卷宋陸佃農師著其子宰為之序名埤雅者謂為爾雅之輔也顧舊有刻板既廢於兵今江西憲副林瑜行部過贛訪得之命工重刻於郡學此書於博物之學蓋有助焉

小學集成

古人小學之教不行於後世晦菴先生蒐輯傳記以為此書有功於學者甚大建安何士信纂集諸家之說以為集成又有功於此書甚切蓋義理度數隨在著明不待以考求也讀小學者必不可無吾家所有共三冊

吉州進士錄

吉州進士錄村民先生陳宗舜甫輯使邦人後進得以考見鄉郡前世文獻之盛而有所興起者此編不為無助蓋吾求之久未得近有傳至北京者永樂乙未曾本

清赴會試遇之錄此見遺惜其間姓名頗有錯誤蓋轉相傳寫所致也

宋名臣言行類編舉要

右宋名臣言行類編舉要一冊余游武昌時得之郭儼彥莊甫此書吾廬陵鍾堯俞編前後集總十六卷鍾自序云前集舉言之體後集發言之用始終皆有微意蓋取朱子所編及會要長編諸書所紀有益於世教者而類編之以為此書有足觀者堯俞咸淳四年以史

館編校得旨赴殿進士出身

崔豹古今註

崔豹古今註一冊三卷輿服都邑音樂鳥獸蟲魚草木
雜注凡七篇豹晉人字正熊官至太傅丞此書蓋博物
志之類有足觀者余得之曹冀成

羣書考索

羣書考索前後續別四集宋章如愚編此書後出纂錄
先儒論說精義特多故便益學者吾所畜十七冊得之

友人武昌鄧貞存誠

冊府元龜

冊府元龜宋真宗時楊億王欽若等奉詔類輯分五十部總一千卷此特詞臣部四卷耳余昔游武昌得之蔣隱溪云

吉水楊氏族譜後

右吉水楊氏譜一冊伯父吏部公手筆初公罷官家居篤志修宗譜時吉水族人有携至此譜者公錄之將以

備參考未幾竟謝世不及修嗚呼惜哉此譜亡弟仲陸所藏歲久頗缺落因取綴葺之而志其後

世說新語

錢塘王羽儀之為禮官與余往還喜收書或歲餘或數月不見相見輒有一書見贈蓋相知故也此集近代祀嵩岳還所贈者

羣書備數

右羣書備數一冊前翰林編修張美和輯臨江有刻板

余得之庶吉士曾泉美和又嘗輯理學類編二書蓋皆
資益小學者也

木鍾集

木鍾集一冊朱子門人永嘉陳埴器之著余初得於江
夏樊思齋子賢子賢遺余他書尚多後率為親友持去
今獨存此集及韓文耳余弱冠至武昌逆旅與子賢居
相接一見相好如平生時年已七十其少與郡人聶炳
南昌包希魯交厚嘗親見虞揭歐陽原功許可用諸公

其為學有要領治詩經評論古今人物及忖度事後當
成敗皆有理而浮湛市廛以賣書為業雖鄉人莫或知
之者獨吳啟公佑時來就之然不知其意也頗喜作中
州樂府以為馮海粟之豪俊張小山之精麗當無而有
之時有所作輒為余誦焉余一日效其體和數篇見之
愀然不懌曰老夫豈以是望賢者又曰老夫過矣余甚
愧焉自是不復與余言樂府矣可謂愛人以德者也未
幾而別別未幾遂卒惜哉不肖駑劣既無副前輩之望

獨其拳拳厚意至于今未始一日忽忘之也故因此書識余之情

太平廣記

右太平廣記一冊自二百第七卷至第十卷所記書畫事蓋斷簡也此書得之武昌王玠道原道原本南昌脩江人從軍在武昌為人落魄喜作詩頗與余往來余家尚有其詩數篇然極意道家之學亦有著述蓋其學不過言語文字之間非真有所修有所得也後以羸病卒

卒至今未數年其徒張大之以為得道稱祖師畫像崇奉近有傳至京師者余不知其何以得此也

事文類聚

事文類聚六集總二百二十一卷前後續別四集宋祝穆和父編祝晦菴姻家子嘗及門矣新外二集富大用時可編皆載官制富不知何時人而元之官制皆具固知必後出此書以類聚名然其事及文世所共知者往往闕而不載何也吾家三十冊得之山東李吉李嘗為

吾邑大夫

自警編

右自警編刻板在蜀中分為五冊余得之重慶教授彭孔脩此書有益於人然余欲刪其重複而精擇之又欲博采諸史所載嘉言善行依此例而通類之皆未暇也

仕學規範

仕學規範四十卷宋張鉉時可編其目有六曰為學行已蒞官陰德作文作詩所錄皆宋名賢時可與晦菴先

生同時先生編宋名臣言行錄此書嘗引用之蓋二書
皆有益學者士大夫家不可闕吾家規範五冊刻板在
蜀得之黎教授德讓者也

策場備要

右策場備要元吉水解觀我先生輯先生名觀一字伯
中邃於易諸子百氏無不該貫一日謁吳文正公適公
與學者論歷法先生備舉先儒之說纖悉不遺而一斷
以已意公駭曰伯中非今之學者因共講論三日而後

已然屢舉不第至正中修遼金宋三史歐陽楚文公揭
文安公文薦之徵至論議不合竟去然其所嘗私錄宋
遼金事甚富朝廷得其書悉采用之惜乎其人國史無
聞焉

考古圖

右考古圖二冊并埤雅二冊皆得之贛守王遂蓋其刻
板皆在贛也

五雲方尺

右五雲方尺一冊先伯父漁灌府君親錄仲殷兄所藏
仲殷兄歿余得之仲基兄冠婚喪祭前輩所重至於書
簡必循守法度如此不如今人之草草也謹藏以示後
人

橘亭幽興集

右橘亭幽興集一冊集古棋法也友人鄧存誠數與余
棋余不能勝存誠授余此集自是余頗勝存誠然僅勝
存誠而已耳未有以勝餘人也始余未習棋授官翰林

晚退之暇或與光大相聚以此為嬉光大機悟敏駸駸有造詣余不能及也是時同官能棋者頗衆以所造深淺高下各相為耦日彰仲益一耦也光大宗豫一耦也用行民則一耦也崇壁與果之用之與余又各自為耦希範不及果之而差勝余然喜持論議不屈日彰嘗戲余曰吾棋如坐十一層塔頂公之棋殆在百尺井底乎余曰公尚未及李憨子吾豈不勝林和靖哉仲熙曰既不能及李憨子亦何用勝和靖然仲熙棋猶下而篤

好特過余數人者遇暇輒造用之及余或邀余兩人者就其家閉戶以奕促婦具酒饌款客余以疾戒飲則為糲粬代酒率常至暮或夜二鼓始散然仲熙未嘗一勝不勝未嘗不樂蓋好之而不留意得失者仲熙一人而已余嘗有詩嘲之云年中欲數輸碁日直自新正到歲除時又有好之而不能者若思幼孜能之而不為者伯厚也夫叨職侍近荷國榮寵閒暇不能及時進修以自見乃甘自棄若此且使後生小子視而效之廢學而敗

德皆非小過然當國家太平之時吾徒職務之暇得以從容閒肆適其情者皆上之所賜其安可忘乎故既自訟吾過又以志幸遇云

革象新書

考篇內此書蓋作於至元辛巳以後

類林

類林雜說十五卷類書中之瑣屑者頗有可觀蓋今人所輯刻板在北京國子監

古文矜式

古文矜式余年十六七館淘金袁氏塾中時借錄於鄰
城張子震子震酷嗜積書語余云初未有此書以其家
古錦琴囊易得之蓋世以為秘傳希有之書也然士奇
既得之往往用示人有欲借錄者輒畀之未嘗秘也其
後所錄本失之而嘗從余借錄者又錄此見遺是亦不
閱之效也蓋書籍惟非其人則不可以借如其遇端人
確士槩閱之而不借豈非過乎

文章正宗三集

三首

文章正宗二十四卷吾家八冊宋西山先生真文忠公輯其目有四曰辭命議論叙事詩賦文起左氏公穀止於韓柳詩起康衢擊壤止於李杜如文章雖闕而非明理切用源流之正者不與蓋前後集錄文章未有謹嚴若此者學者用志於此斯識趣正而言不倍矣

右文章正宗二十四卷凡七冊今存五冊欠卷一至卷八不完余客武昌時假館授徒有秦叟者以二子從叟

耿介豁達賈書為業所畜有十餘年不售者以是坐貧
數月束脩無所入叟曰先生用書惟意所取也為取大
學衍義及陶淵明詩叟以為廉指所從學十歲子笑曰
是兒初生時千錢所得耳余曰畜十年不當得萬錢乎
叟曰先生自處厚奈何以薄處我余為再取文章正宗
叟益以王維孟浩然韋應物詩孟常詩皆舊刻特完叟
復顧余笑曰此書亦靜極當動也余既以書去是夜秦
隣家火延秦書肆盡焚之明旦余往弔焉叟曰物成敗

有定數先日而歸先生以獲全者亦數也余後携書在京師姪子相登第賜居崇禮坊一日就吾家取衍義一冊正宗二冊又取陶王孟常詩及他書歸讀是夜隣舍火延相家所畜書盡焚之於是余所得於秦叟者惟存此五冊及衍義三冊如相後一日持去不及於燬然思叟定數之言固非偶然哉

劉士拯給事巡按交趾留此見惠時余初至北京客窓書冊甚少有惠書者即以為珍寶此集凡五冊

文選

昭明文選六十卷唐六臣注於今學者得見漢魏以來
文章獨賴此編之存刻板在太學吾家三十冊初闕頗
多蓋借錄踰累年歷十數家猶未能悉補也凡今書板
多闕不獨此書而欲得一書有印裝補錄之勞非朝夕
所能成者置書之難如此如後之人有之而不知愛重
亦獨何心

韓文

史漢之後文章大家必首稱韓柳余在武昌初得柳文於吳公佑而韓文未有也樊子賢先輩以此本遺余凡四冊且為余誦先儒之言曰退之因攻文而見道周程既明道而發於文君子亦汴流求源耶抑自源徂流耶余甚感其意蓋三十年於今矣忽忽如昨日云者孔子曰四十五十而無聞不勝媿嘆也

柳文

柳文四冊余至武昌與吳啟公佑往還時其家賈書籍

以助日給因取此本見贈洪武己巳歲也又二十有五
年三月朔識

韓柳文

韓柳文各三冊得之建昌秀才黃卓韓文闕外集十卷
柳文闕外集二卷附錄一卷今書坊所行多如此其間
用朱點抹者依謝疊山本墨點抹者羅通齋本通齋名
泰廬陵人范德機嘗師之

續文章正宗

續文章正宗二十卷真文忠公輯其目有二曰論理曰敘事敘事之下各以類分之皆宋文也歐蘇曾王之作為多間有范希文李泰伯劉貢父曾肇及秦黃張晁數篇可謂精矣吾友尹彥璟每不滿其不載司馬溫公諫院題名記此論固當然太極圖說西銘易春秋傳序皆論理之大者而皆不錄何耶豈尊之而不以混於文章家耶此書末卷有目而無文豈亦未成之書哉今刻板在大學吾家凡六冊

歐文書簡

六一公五世孫伋知饒州日取周益公家歐文本重刻
之余近見饒本比益公本增書簡五十餘篇豈伋所自
得而增之歟因取錄置各卷之後

歐文外集

歐文外集二十五卷二冊錄於翰林庶吉士楊勉前有
年譜而行狀墓志祭文附錄在後吾家此文及東坡文
錄者非一手又皆寡諳文理故多錯謬未得校正也

不完韓文

右不完韓文一冊士奇年十二三侍家叔子言先生過水南段福可得之先生指其中批點語士奇曰此先主簿公手筆也而缺壞多矣遂取歸補完重裝蓋於今又四十年最為吾家舊書也

蘇老泉文

右老泉詩文三十餘首與用之同讀全集而擇之者也世之論文章家曰一代不數人一人不數篇觀於此可

知其難矣

二范文集

友人監察御史王守真初為蘇州推官奏事京師胥倖
因問郡之先賢其後今何如首云范氏子孫尚衆皆敦
實非公事不入城府保藏先世文集刻板完具如新既
共慨歎天道於仁人有後如此世之人鑒之而不為仁
者其獨何心又從求得此集文正公文二冊奏議一冊
年譜一冊忠宣公文二冊褒賢碑記等文一冊總七冊

云

蘇東坡文

右蘇東坡六冊錄於胡祭酒若思蓋所錄者東坡集起二十四卷至四十卷後集起八卷至十卷外集起二十五卷至九十卷奏疏內外制及詩皆未得錄也

曾南豐文

南豐先生文錄本四冊起第九卷至五十卷錄於金諭德幼孜闕前八卷詩未錄先生之文所為可貴非獨文

之工言於濂洛之學未著之先而往往相合亦由學之
正也古之君子為文皆本於學學博矣又必貴乎正故
先生之文與蘇氏雖皆傳於世而學則不可以槩論也

黃山谷刀筆

山谷先生刀筆一冊余得之蘇州秀才蕭湘凡二十卷
不獨書詞之工其論為學作文寫字皆有至理惜此本
鈔本缺折處多錯謬未得善本正之

朱文公文集

晦菴先生文集一百卷先生平昔於四書諸經史傳發
先哲之精蘊啟來學之聰明者其書多矣乃其餘力見
諸文章其多又如此而皆至理之所寓也學士君子所
不可無者吾家二十二冊得諸楊庶子勉仁云

呂東萊文

東萊先生文集十五卷別集十六卷集錄十卷外集五
卷又有附錄在後吾家八冊得於中書舍人陳彛訓總
題曰文集刻板在北京國子監所闕蓋四之一云

枅欄集

枅欄集者閩沙縣鄧肅志宏所著肅有傳在宋史初為
大學生進花石詩諷徽宗被斥高宗即位擢左正言數
言國家大計又被斥觀其詩文可以想見其人吾家二
冊得諸肅邑人今吏科給事中陳山云

錄崇古文訣

右錄崇古文訣一冊起韓退之毛穎傳訖錢君倚義田
記不完書也前德安貳守羅先生手筆先生為人整潔

雖細微事及造次之頃必不苟嘗曰小事不敢苟則於大事亦不苟矣此編蓋避兵亂山谷中所錄也

錄吳草廬文

右錄草廬先生文一冊余得之晏彥文甫總敘錄問答書說記序一百六十一首皆理致精粹後學所宜盡心者

文言集

右文言集元吳文正公草廬先生所著也刻板在衢州

常山縣余得之金司直用誠自一卷至三十六卷凡三冊元之盛際北有許文正公南有先生皆道學大儒其功在朝廷在學者表然重當時而垂後世文雖先生餘事然使後學得以窺見先生萬一而私淑焉者獨有賴於斯先生諸經皆有著述及支言集皆已板行兵後散失其家所存惟支言集公五世孫瓘為常山丞能持身愛民欲重刻支言集而貧無資乃歸賣其家園田為之刻未畢坐事去官其已刻者余所得是已未刻尚多蓋

碑志之類

支言後集

右草廬先生支言集自三十七卷至一百卷凡二冊余續得之先生五世孫子常先生元大儒又先待制延祐甲寅鄉闈座主有通家之舊故余所至聞其後世輒願見之所遇如常山丞子宣如子常皆敦雅有行義不愧其世家而此集實子宣子常所協力而成之者也

錄虞學士文

錄虞學士文六冊傳於周編修崇述家即韓克莊所刻本也世又有大字刻本歐陽圭齋為序者與此微異二刻皆不存今書坊本視余家所錄缺三之一公以道學自重而今所傳者文耳讀者可以即此而窺彼也

錄揭文安公文四集

四首

揭文安公篤學清操為文章義正辭潔矩矱森嚴一代之望也嘗見公文集刻本有二考之皆為授經郎以前所作余家所錄文二冊傳於蔣立恭家比聞僧錄司官

溥洽有公文集十冊詢之已失其所存九冊其徒持歸四明不及得觀也

右揭學士詩及頌表亦舊錄於蔣立恭者今書坊所刻揭詩多此錄所無宜補之未暇也

元史揭公傳見公上太平政要四十九冊而無其文凡余見公文集數本亦無之獨此本舊錄於蔣立恭家者有固當為善本也

右揭文安公曼碩文集十二冊永樂丁酉錄於朱中書

李寧蓋得禮部郎中王儀之家藏刻本也凡五十卷而
已缺十三卷八卷至十四卷十八卷至二十一卷皆詩
二十二卷賦四十卷題跋此十三卷所缺者余舊錄本
蓋間有之然此集詩文亦有目錄雖有而卷內無者不
知如何也

黃文獻公文二集

二首

黃文獻公潛字晉卿金華人與先待制同登元延祐乙
卯進士第此科得士最盛左右榜通五十六人其文行

政治國史有傳者歐陽玄原功馬永古特祖常伯庸許有
任可用張起巖夢臣于文傳壽道楊載仲弘公與先待
制十數人也而兵後文集之存者惟公一人蓋亦門人
之力余家六冊得諸王杰文英公之鄉人云

進士嶺南郭瑛為金華令能守身愛民民歸之如父母
有古良吏之風焉其來京師也惠余文獻集及胡仲子
文文獻先曾祖同年進士余所宜重矧郭令所惠乎

柳待制文

柳待制文集四冊二十卷金華柳貫道傳所著道傳初
受學金仁山而為文古雅辨博金華故文獻郡元之盛
際道傳及黃晉卿先後而出與虞揭歐陽諸君子齊名
可謂盛矣其文皆有刻板在郡學余皆得之文英初得
晉卿文尚完道傳缺三之一耳至今未數年然聞晉卿
文無復全書而道傳所存僅五之二惜哉此其邦之文
獻固可知乎而亦豈獨金華為然

劉申齋文

劉申齋先生名岳申字高仲吾廬陵人元史有傳與先
待制友善考家集先祖兄弟皆出其門此集一冊余錄
於胡學士光大聞今吉水一士人家藏先生親筆文彙
甚富欲求一見無由得造也蓋非獨其文高古於吾郡
故家文獻多可考也

濂洛諸儒像

濂洛二程紫陽四先生皆道統之正宗萬物之元氣孔
孟以來至矣哉不可尚已諸先生明聖人之精為之輔

翼皆盛有功斯道者也紫陽先生贊辭備矣學者瞻仰
德容涵泳贊辭蓋庶乎如及禮義之門而望見道德之
堂也然所為不可尚與夫盛有功者具在成書學者不
可即此以求至乎易曰知至至之余與克己雖老亦可
以已哉因拜觀此卷敬書于後

余青陽文

右余青陽文集一冊得之鄉貢進士柯暹蓋近年安慶
所刻附以事蹟及傳誠當然何用以祭文挽詩贊其後

也挽詩有惡謬者此編刻者之陋蓋又甚於南昌刻文山集也

李雲陽文

雲陽李祈別號祈字一初茶陵人元至順癸酉進士第
二人官至儒學提舉元亡遂不仕此刻板在永新余近
得之永嘉秀才徐弘道

續潛溪文粹

右續潛溪文粹二冊多缺板本曹興成家書借余而未

歸者也對之每興山陽聞笛之歎

覆瓿集

覆瓿集誠意伯括蒼劉基著其家有刻板余所蓄三冊得之黃學士宗豫劉之文不減宋潛溪而世獨稱宋者劉掩於功業耳

郁離子

郁離子一冊括蒼劉基伯溫撰郁離以言其文也刻板在其家余得之前浙江布政司照磨王仲志

胡仲子文

胡仲子文刻板在金華吾家二冊周紀善是修所惠者
仲子名翰一字仲申與宋學士同門洪武初嘗預修元
史其文粹深宋甚推重云

貝清江集

清江集者樵李貝瓊廷臣著瓊嘗師楊廉夫洪武初預
修元史仕為國子助教以卒余家三冊洪武乙亥得之
其子楚府紀善季翔云

蘇編修文

蘇編修伯衡字平仲宋文定公之裔洪武初文名與宋潛溪伯仲間潛溪為學士嘗舉以自代此集刻於處州余家四冊得之王景彰學士

吳魯客文

閩人吳魯客名海近時閩中之文以魯客為巨擘其徒王孟楊編刻以傳此冊孟楊為翰林檢討時見贈者也

鄭氏文集

右浦江義門鄭氏文集總十二冊翰林檢討叔美所惠其麟溪集二冊載時賢詩文及譜圖規範葯房集五冊隨菴集一冊半軒集二冊遂初齋集二冊皆鄭氏先世之文義門鄭氏聞於四方久矣其累世德行文章皆具於此可以考徵而規範之井然則治家者皆可以為法矣

師山文集

師山集者元歛人鄭玉著同郡程以文為之序朝廷嘗

徵玉為待制以疾辭家居惟日著書為事國朝兵入徽
州守將將要致之曰吾豈事二姓者明日具衣冠北面
再拜自經死見元史忠義傳此集吾得之歐陽允和

劉文震集

右劉文震集文震名聞安城人元天歷庚午進士官至
沔陽知府文名重當時後以沔陽之節不完故不見稱
於世今其家已無嗣此集近年其外孫楊嗣慶所編刻
余得之安城尹道冲

山陰集

山陰集者清江劉永之仲脩著仲修治春秋學其詩文
清麗古雅尤為當時所重工書法篆楷行草皆有師承
嘗聞之長者始仲修既冠未知學因過婦翁同郡練伯
升翁長子婿也蚤有文譽翁家特異視之而庸衆人視
仲修即發憤歸就學窮日夜不懈親良師友講論切磋
三年學業大進時譽更出伯叔右是以士貴乎立志也
又聞仲修家富貲賒貸施數郡仲修獨泊然布素日靜

處一室書籍翰墨自娛客至不為盛饌酒數行論文賦
詩焚香鳴琴而已家事未嘗一留意非逢掖士未嘗一
接言笑也可謂幽貞絕俗者矣此集吾得之右春坊中
允吳君仲平甫云

靜修文集

大賢君子其身係國家之元氣斯文之命脉實天生之
為世道計初非有出處之異也元之盛際許魯齋劉靜
修其人焉魯齋勲業在朝廷在學者靜修不出而高風

清節與之齊駕蓋百世之師也靜修之書傳於今者惟此集學者豈可忽哉

交州橐

右元天台陳孚剛中交州橐一冊蓋至元壬辰奉使安南所作有玉堂橐附在後士以氣為主有其志無其氣不能有為志與氣俱而不得乎命亦不能以有為也若剛中其亦不得於命者歟此集刻板在淞江余舊得之廬陵王仲志云

朱文公年譜二集 二首

朱文公年譜一冊刻板在徽州余得之翰林典籍陳壽
朱子年譜永樂初元得之前江西僉憲呂升視新得者
差明白

元城先生語錄

右元城劉忠定公語錄一冊亦黎教授所贈者公之學
得於司馬文正公橫浦先生序之的矣學者不可忽也
穀軒彙後

平生懶作詩文往往為親朋鄉人所強不得已應之前年王穉鍾暉及康榮甥在京師各為取橐草錄出數十篇遂綴作一帙而題其首曰穀軒橐既不復次第其作之歲月其間多錯誤亦不及盡改也寄遺仲子使姑藏之耳

崇古文訣

樓迂齋選古文訣雖其去取自有意要之不若真西山文章正宗之精而粹也吾家四冊市之於張侗中書之

子

金石例

金石例十卷元侍講學士潘文僖公著纂輯古式及例至詳備文僖名昂霄字景梁號蒼崖先待制延祐乙卯廷試讀卷官其書固吾所當重惜此冊得之湖廣僉憲王霖而出於吏人所錄不整未有暇力更錄也永樂丁酉九月一日識

南北史

李延壽撰南北史南起宋盡陳凡八十卷北起魏盡隋
凡一百卷延壽唐史官為此書先儒多善之所少者於
妖異謠讖頗繁猥然過舊史遠矣今刻板在福州府學
吾家南史十五冊北史十三冊總二十八冊得之歐陽
允和者也

吳彥直詩後


此合浦令吳彥直謫居任丘臨終所作二詩一以寄朋
友一念其子之在遠外皆天理民彝之正也余嘗聞翰

林王侍講時彥道其為學與政蓋一時士大夫之賢者而屬續之際其所言切而婉整而不亂如此尤足以見平生之所養彥直臨川文正公之曾孫也可為不辱者矣

清類經星分野大畧抄本

右所錄郡縣詳畧不同者蓋以分野書與今刊行郡縣參對如全郡所轄州縣星域皆同則但書其目而欲知其詳則於刊行郡縣中考之如所轄州縣星域不同則

明著某州某縣庶幾不紊蓋偶遇此書倉卒抄錄不能
詳整而為此簡便有暇當錄過然聞南京太學有全書
刻板必求史志靜印寄也永樂甲辰四月朔志



東里續集卷十八